

# **Cartulaire de Marmoutier pour le Perche (N.-D. du Vieux-Château Collégiale de St-Léonard de Bellême et Prieuré de St-Martin-du-Vieux-Bellême), Nr. 207**

Noverint presentes et futuri Majoris Monasterii habitatores quod Herveus de Damciaco et Fulcodius consanguineus ejus tractum decime nostre de ipsa Damceii villa habebant et quatuor frumenti sextarios, totumque stramen ejusdem decime. Hec omnia dederunt beato Martino Majoris Monasterii et nobis monachis ipsius ; proprius apud Damceium, domno Guillelmo priori Majoris Monasterii donum istud facientes ubi interfuerunt Bernardus, prior Bellismensis, Herveus monachus, pater prefati Hervei, hujus elemosine datoris, et Odo monachus noster, frater ejus, multique alii. Postea autem ipse predictus Herveus et Fulcodius, ipsius consanguineus, Majus Monasterium venientes die hiemalis festivitatis, in generali capitulo nostro istud donum denuo domno Odoni Abbati fecerunt, et super altare beati Martini deinde miserunt, vidente Petro Burdone, famulo Majoris Monasterii et multis aliis.